

ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆԻ ԳԻՏԱԿԱՆ ԽՈՐՀՐԴԻ

ՈՐՈՇՈՒՄ N 1/10

2013 թվականի հոկտեմբերի 3-ի թիվ 1 նիստի

«ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆԻ ԼԱՎԱԳՈՒՅՆ ՈՒՍԱՆՈՂ» ԱՄԵՆԱՄՅԱ
ՄՐՑԱՆԱԿԱԲԱՇԽՈՒԹՅԱՆ ԿԱԶՄԱԿԵՐՊՄԱՆ ԵՎ ԱՆՑԿԱՑՄԱՆ ԿԱՆՈՆԱԿԱՐԳԸ
ՆՈՐ ԽՍԲԱԳՐՈՒԹՅԱՄԲ ՀԱՍՏԱՏԵԼՈՒ ՄԱՍԻՆ

Ղեկավարվելով ԵՊՀ կանոնադրության 30-րդ կետի 3-րդ և ԵՊՀ գիտական խորհրդի կանոնակարգի 4-րդ կետի 3-րդ ենթակետերով՝ Երևանի պետական համալսարանի գիտական խորհուրդը որոշում է.

1. «Երևանի պետական համալսարանի լավագույն ուսանող» ամենամյա մրցանակաբաշխության կազմակերպման և անցկացման կանոնակարգը (հաստատված ԵՊՀ գիտական խորհրդի 2008թ. փետրվարի 14-ի նիստում) հաստատել նոր խմբագրությամբ:

2. Սույն որոշումն ուժի մեջ է մտնում ընդունման պահից:

ԵՊՀ ԳԻՏԱԿԱՆ ԽՈՐՀՐԴԻ ՆԱԽԱԳԱՀ՝

Ա. Հ. ՄԻՄՈՆՅԱՆ

ԵՊՀ գիտական խորհրդի նախագահ՝

Ա. Հ. Մինոնյան

ԿԱՆՈՆԱԿԱՐԳ

«ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆԻ ԼԱՎԱԳՈՒՅՆ ՈՒՍԱՆՈՂ»
ԱՄԵՆԱՄՅԱ ՄՐՑԱՆԱԿԱԲԱՇԽՈՒԹՅԱՆ ԿԱԶՄԱԿԵՐՊՄԱՆ ԵՎ ԱՆՑԿԱՑՄԱՆ

1. ԸՆԴՀԱՆՈՒՐ ԴՐՈՒՑԹՆԵՐ

1.1. Սույն կանոնակարգով սահմանվում է «Երևանի պետական համալսարանի լավագույն ուսանող» ամենամյա մրցանակաբաշխության (այսուհետ՝ մրցանակաբաշխություն) կազմակերպման և անցկացման կարգը:

1.2. Մրցանակաբաշխությունը կազմակերպվում և անցկացվում է տարին մեկ անգամ: Նպատակն է խրախուսել Երևանի պետական համալսարանի բակալավրիատում և մագիստրատուրայում սովորող ուսանողների առաջադիմությունը և խթանել նրանց գիտական և հասարակական ակտիվությունը: Մրցույթին կարող են մասնակցել ԵՊՀ բոլոր ֆակուլտետների և մագիստրոսական կրթական ծրագիր իրականացնող կենտրոնների կամ այլ ստորաբաժանումների ուսանողները:

1.3. Մրցանակաբաշխությունն անցկացվում է ուսումնական տարվա երկրորդ կիսամյակում:

(1.3. կետը փոփոխվել է 30.11.2017թ. ԵՊՀ գիտական խորհրդի թիվ 2/6 որոշմամբ):

1.4. Սույն կանոնակարգը հաստատվում, դրանում փոփոխություններ և լրացումներ են կատարվում Երևանի պետական համալսարանի գիտական խորհրդի որոշմամբ:

2. ՄՐՑԱՆԱԿԱԲԱՇԽՈՒԹՅԱՆ ՀԱՆՁՆԱԺՈՂՈՎԻ ԿԱԶՄԸ ԵՎ ԳՈՐԾՈՒՆԵՈՒԹՅԱՆ ԿԱՐԳԸ

2.1. Մրցանակաբաշխությունը կազմակերպում և անցկացնում է «Երևանի պետական համալսարանի լավագույն ուսանող» ամենամյա մրցանակաբաշխության հանձնաժողովը (այսուհետ՝ Հանձնաժողով), որը բաղկացած է 9 հիմնական անդամից՝ Երևանի պետական համալսարանի ուսանողների, շրջանավարտների և հասարակայնության հետ կապերի գծով պրոռեկտորը, Ուսանողների հետ տարվող աշխատանքների բաժնի վարիչը, Ուսումնական վարչության պետը, Հասարակայնության հետ կապերի և լրատվության վարչության պետը, Արհեստակցական կազմակերպության նախագահը, Գիտակազմակերպական բաժնի վարիչը, Իրավաբանական բաժնի վարիչը, Ուսանողական խորհրդի նախագահը, Ուսանողական գիտական ընկերության նախագահը: Հանձնաժողովի կազմում յուրաքանչյուր ֆակուլտետի (կենտրոնի) դեպքում

ընդգրկվում են տվյալ ֆակուլտետի (կենտրոնի) դեկանը (տնօրենը) և ուսանողական խորհրդի նախագահը:

2.2. Հանձնաժողովը նախագահում է ԵՊՀ ուսանողների, շրջանավարտների և հասարակայնության հետ կապերի գծով պրոռեկտորը, իսկ քարտուղարն է Ուսանողների հետ տարվող աշխատանքների բաժնի վարիչը:

2.3. Հանձնաժողովը սահմանում է իր գործունեության աշխատակարգը:

2.4. Թեկնածուների առաջադրման, հաղթողների ընտրության, մրցանակաբաշխության անցկացման (մրցանակների հանձնման հանդիսավոր արարողության) և այլ աշխատանքների կազմակերպման համար Հանձնաժողովը հրավիրում է նիստեր և աշխատանքային խորհրդակցություններ:

2.5. Հանձնաժողովի նիստն իրավագոր է, եթե դրան մասնակցում է անդամների կեսից ավելին: Հանձնաժողովի որոշումներն ընդունվում են ներկաների ձայների 2/3-ով: Մրցանակաբաշխության հաղթողների վերաբերյալ Հանձնաժողովի որոշումները մինչև մրցանակաբաշխության անցկացման օրը հրապարակման ենթակա չեն:

3. ՄՐՑԱՆԱԿԱԲԱՇԽՈՒԹՅԱՆ ԹԵԿՆԱԾՈՒՆԵՐԻ ԱՌԱՋԱԴՐՄԱՆ ԿԱՐԳԸ

3.1. Մրցանակաբաշխությանը կարող են մասնակցել բոլոր այն ուսանողները, ովքեր առնվազն 4 կիսամյակ հանդիսացել են Երևանի պետական համալսարանի ուսանող, վերջին երկու կիսամյակների ընթացքում ունեցել են բարձր կամ գերազանց առաջադիմություն (ՄՈԳ-ը՝ 16 և բարձր), ինչպես նաև ունեն սույն կանոնակարգի 3.4 կետում նշված ձեռքբերումները: Մրցանակաբաշխությանը մասնակցելու (որպես թեկնածու առաջադրվելու) համար ուսանողը, սահմանված կարգի համաձայն, պետք է ներկայացնի համապատասխան հայտ և անհրաժեշտ կից փաստաթղթերը:

3.2. Մրցանակաբաշխության անցկացման օրվանից առնվազն 30 օր առաջ Հանձնաժողովը հայտարարում է մրցանակաբաշխության անցկացման պայմանների և թեկնածուների առաջադրման մասին: Թեկնածուների առաջադրումն իրականացվում է համապատասխան հայտերի միջոցով՝ թղթային կամ էլեկտրոնային (առցանց) ձևաչափով (հայտի ձևը հաստատվում է Հանձնաժողովի կողմից): Հայտերի ներկայացման վերջնաժամկետը, որը պետք է լինի մրցանակաբաշխության անցկացման օրվանից առնվազն 10 օր առաջ, սահմանում է Հանձնաժողովը:

3.3. Մրցանակաբաշխությանը մասնակից ուսանողների հայտերը և կից փաստաթղթերը ներկայացվում են ԵՊՀ ընդհանուր բաժին: Էլեկտրոնային (առցանց) հայտերի ներկայացման ձևաչափ սահմանելու դեպքում՝ փաստաթղթերը ներկայացվում են համապատասխան առցանց գործիքի միջոցով: Էլեկտրոնային (առցանց) հայտերի ներկայացման մասին որոշումն ընդունվում է Հանձնաժողովի կողմից մրցանակաբաշխության անցկացման պայմանների հայտարարության ժամանակ:

3.4. «ԵՊՀ լավագույն ուսանող» մրցանակակիր որոշելու համար դիտարկվում են ուսանողի հետևյալ ձեռքբերումները.

ա/ առաջադիմություն,

բ/ ներգրավվածություն գիտական աշխատանքներում,

գ/ մասնակցություն ներհամալսարանական արտալսարանային կյանքին,

դ/ արտահամալսարանական ակտիվություն՝ մշակույթի, սպորտի, արվեստի և այլ ոլորտներում հաջողություններ:

3.5. Մրցանակաբաշխության մասնակցի հայտին կից կարող են ներկայացվել հետևյալ փաստաթղթերը.

ա/ պրոֆեսորադասախոսական կազմի ներկայացուցիչների բնութագիր (առավելագույնը երկու բնութագիր),

բ/ ֆակուլտետի ուսանողական խորհրդի և ուսանողական գիտական ընկերության նախագահի բնութագրերը,

գ/ տպագրված գիտական աշխատանքների պատճենները կամ դրանք հավաստող այլ փաստաթղթեր (եթե այդպիսիք կան),

դ/ ներհամալսարանական ակտիվությունը հավաստող փաստաթղթեր (եթե այդպիսիք կան),

ե/ արտահամալսարանական ակտիվությունը հավաստող փաստաթղթեր (եթե այդպիսիք կան),

զ/ այլ փաստաթղթեր և նյութեր, որոնք լավագույնս կներկայացնեն մրցանակաբաշխությանը մասնակից ուսանողի՝ սույն կանոնակարգի 3.4. կետում նշված ձեռքբերումները:

Ներկայացված բնութագրերը և այլ փաստաթղթերը պետք է հստակ և հնարավորինս մանրամասն ներկայացնեն ուսանողի՝ սույն կանոնակարգի 3.4. կետում նշված ձեռքբերումները:

Առաջադիմության վերաբերյալ տեղեկատվությունը Հանձնաժողովին կտրամադրվի ԵՊՀ համապատասխան ստորաբաժանումների կողմից:

3.6. Մրցանակաբաշխության հայտերի ընդունման վերջնաժամկետը լրանալուց հետո՝ երկօրյա ժամկետում, ԵՊՀ կայքում հրապարակվում է հայտ ներկայացրած ուսանողների ցանկը: Եթե որևէ ֆակուլտետից (կենտրոնից) սահմանված ժամկետում ստացվել է սույն կանոնակարգի 3.1. կետի պահանջներին համապատասխանող երեք կամ ավելի քիչ թվով հայտ, ապա ֆակուլտետի դեկանը հայտերի ներկայացման վերջնաժամկետից հետո՝ երեք օրվա ընթացքում, կարող է առաջադրել լրացուցիչ թեկնածուներ:

4. ՄՐՑԱՆԱԿԱԲԱՇԽՈՒԹՅԱՆ ՀԱՂԹՈՂՆԵՐԻ ԸՆՏՐՈՒԹՅԱՆ ԸՆԹԱՑԱԿԱՐԳԸ

4.1. Մրցանակաբաշխության հաղթողի ընտրությունն իրականացվում է մրցութային կարգով, երկու փուլով՝ ներկայացված հայտերի գնահատում և հարցազրույց, որոնց արդյունքում ձևավորվում է մրցութին մասնակից ուսանողի ընդհանուր միավորը:

4.2. Առաջին փուլում Հանձնաժողովը (հիմնական կազմով) դիտարկում է հայտ ներկայացրած ուսանողների համապատասխանությունը մրցանակաբաշխության ֆորմալ պահանջներին և ըստ սույն կանոնակարգի սահմանված չափանիշների՝ կատարում հայտերի գնահատում:

4.3. Հայտի և կից ներկայացված փաստաթղթերի բալային գնահատման ժամանակ Հանձնաժողովն առաջնորդվում է սույն կարգի 4.4, 4.5, 4.6, 4.7 և 4.8 կետերում նշված չափանիշներով:

4.4. Առաջադիմության համար տրվող միավորներ. թեկնածուների ուսման առաջադիմությունը առավելագույնը գնահատվում է 20 միավորով: Միավորը հաշվարկվում է հետևյալ բանաձևի համաձայն՝ $10 + (ՄՈԳ - 16) \times 2.5$:

Մագիստրատուրայի ուսանող-թեկնածուների դեպքում հաշվարկվում է բակալավրիատի ՄՈԳ-ի և ընթացիկ ՄՈԳ-ի միջին թվաբանականը:

4.5. Ներգրավվածությունը գիտական աշխատանքներում. թեկնածուների՝ գիտական աշխատանքներում ներգրավվածության գնահատականը ձևավորվում է ստորև նշված 4.5.1, 4.5.2, 4.5.3, 4.5.4. և 4.5.5. կետերով՝ թեկնածուին հասանելի

միավորների հանրագումարով (հանրագումարային միավորը սահմանափակվում է 15 միավորով): Վերը նշված կետերով սահմանված չափանիշների համաձայն՝ մրցույթի հաղթողը պետք է ապահովի գիտական աշխատանքների ներգրավվածության նվազագույն շեմը՝ 2 միավոր:

4.5.1. Զեկուցմամբ մասնակցություն գիտաժողովներին, սեմինարներին, կոնֆերանսներին, համաժողովներին և գիտական ուղղվածություն ունեցող այլ միջոցառումներին. մեկ զեկուցման համար՝ 1 միավոր, երկու և ավելի զեկուցումների համար՝ 2 միավոր:

4.5.2. Տպագրված թեզիսներ. մեկ տպագրված թեզիսի համար տրվում է 1 միավոր, երկու և ավելի թեզիսների համար՝ 2 միավոր:

4.5.3. ԲՈՂ-ի պահանջներին համապատասխան՝ մեկ տպագրված հոդվածի համար տրվում է 4 միավոր, երկու և ավելի հոդվածների համար՝ 7 միավոր: Գիտակրթական ոլորտում այլ ձեռքբերումները (պատենտ, հեղինակային իրավունքի արտոնագիր) հավասարեցվում են ԲՈՂ-ի պահանջներին համապատասխան տպագրված հոդվածներին:

4.5.4. Արտերկրի հեղինակավոր (որոշվում է Հանձնաժողովի կողմից) ամսագրերում մեկ տպագրված հոդվածի համար տրվում է 7 միավոր, երկու և ավելի հոդվածների համար՝ 13 միավոր:

4.5.5. Հեղինակավոր մրցանակի կամ միջազգային օլիմպիադայի դիպլոմին արժանանալու դեպքում տրվում է 2 միավոր (յուրաքանչյուրի համար), սակայն առավելագույնը՝ 4 միավոր:

4.5.6. Մրցույթին մասնակից թեկնածուների՝ գիտական աշխատանքներում ներգրավվածության գնահատականը 4.8.1, 4.8.2, 4.8.3, 4.8.4. և 4.8.5. կետերով հաշվարկվելուց (հանրագումարային միավորը սահմանափակվում է 15 միավորով) հետո ֆակուլտետի դեկանատի կողմից գնահատվում է 0-5 միավորով, որը գումարվում է վերը նշված կետերով հաշվարկված գնահատականին: Մրցույթին մասնակից թեկնածուների՝ գիտական աշխատանքներում ներգրավվածության ընդհանուր գնահատականը սահմանափակվում է 20 միավորով:

4.6 Մասնակցություն ներհամալսարանական կյանքին. թեկնածուների ներհամալսարանական կյանքին մասնակցության գնահատականը ձևավորվում է ստորև նշված 4.6.1, 4.6.2, 4.6.3 և 4.6.4 կետերով՝ թեկնածուին հասանելի միավորների հանրագումարով (հանրագումարային միավորը սահմանափակվում է 15 միավորով):

Մրցույթի հաղթողը պետք է ապահովի ներհամալսարանական հասարակական աշխատանքների ներգրավվածության նվազագույն շեմը՝ 5 միավոր:

4.6.1. Ֆակուլտետի (կենտրոնի) ուսանողական հասարակական (արտալսարանային) տարբեր միջոցառումներում ակտիվ մասնակցության ներգրավվածության համար (մասնակցություն տարբեր միջոցառումներին, բացառությամբ այն միջոցառումների, որոնք դիտարկվել են 4.5.1. կետում) թեկնածուին տրվում է 2-ից 4 միավոր:

4.6.2. Ֆակուլտետի (կենտրոնի) ուսանողական հասարակական (արտալսարանային) տարբեր միջոցառումների կազմակերպչական աշխատանքներին մասնակցության համար թեկնածուին տրվում է 3-ից 6 միավոր:

4.6.3. Ֆակուլտետի (կենտրոնի) ՈԻԽ կամ ՈԻԳԸ անդամներին, ՈԻԽ համագումարի պատվիրակներին, ֆակուլտետի խորհրդի անդամներին տրվում է 3 միավոր:

4.6.4. Համահամալսարանական ուսանողական հասարակական աշխատանքներում ակտիվ ներգրավվածության համար տրվում է 5-ից 8 միավոր: ԵՊՀ ուսանողական

կազմակերպությունների կենտրոնական մարմիններում ընտրված ուսանողներին տրվում է 2 միավոր:

4.6.5. Մշակույթի, սպորտի, արվեստի և այլ ոլորտներում նշանակալի հաջողությունների համար Հանձնաժողովի որոշմամբ կարող է տրվել մինչև 7 միավոր, իսկ բացառիկ դեպքերում՝ 10 միավոր:

4.7. Առաջին փուլի արդյունքում յուրաքանչյուր ֆակուլտետից (կենտրոնից) ընտրվում են մրցանակաբաշխության հաղթողի երեք հավակնորդներ: Հիմնական հավակնորդների անունները հրապարակվում են ԵՊՀ կայքում մրցանակաբաշխության անցկացման օրվանից (մրցանակների հանձնման հանդիսավոր արարողությունից) առնվազն երեք օր առաջ: Հիմնական հավակնորդները հրավիրվում են մասնակցելու մրցանակների հանձնման հանդիսավոր արարողությանը. մրցանակաբաշխության հաղթող չճանաչված հիմնական հավակնորդները պարզևատրվում են «Երևանի պետական համալսարանի լավագույն ուսանող» ամենամյա մրցանակաբաշխությանը առաջադրվելու և հիմնական հավակնորդ ճանաչվելու մասին պատվոգրով: ԵՊՀ ռեկտորատն ու ԵՊՀ ուսանողական խորհուրդը կարող են սահմանել նաև մրցույթի հիմնական հավակնորդների խրախուսման այլ միջոցներ:

4.8. Հաղթողի ընտրության փուլում յուրաքանչյուր ֆակուլտետից (կենտրոնից) մրցանակաբաշխության հաղթողի երեք հավակնորդները հրավիրվում են հարցազրույցի, որը իրականացվում է Հանձնաժողովի կողմից (հիմնական կազմ և տվյալ ֆակուլտետի դեկան և ՈԻԽ նախագահ): Հայտի հարցերին տրված պատասխանները դիտարկվում են հարցազրույցի ընթացքում: Հարցազրույցի արդյունքում Հանձնաժողովի կողմից յուրաքանչյուր հավակնորդին տրվում է 0-5 միավոր: Հաղթողի անունը հրապարակվում է մրցանակների հանձնման հանդիսավոր արարողության ընթացքում:

4.9. Հաղթողը պարզևատրվում է «Երևանի պետական համալսարանի լավագույն ուսանող» ամենամյա մրցանակաբաշխությանը հաղթելու պատվոգրով և մրցանակաբաշխության համար ռեկտորատի կողմից սահմանված մեդալով: ԵՊՀ ռեկտորատն ու ԵՊՀ ուսանողական խորհուրդը կարող են սահմանել նաև մրցույթի հաղթողների խրախուսման այլ միջոցներ:

4.10. Մրցույթի հաղթող ճանաչված ուսանողը հաջորդ տարի իրավունք չունի մասնակցելու մրցույթին:

5. ՀԱՆՁՆԱԺՈՂՈՎԻ ԸՆԴՈՒՆԱԾ ՈՐՈՇՈՒՄՆԵՐԻ ԲՈՂՈՔԱՐԿՄԱՆ ԿԱՐԳԸ ԵՎ ԺԱՄԿԵՏՆԵՐԸ

5.1. Հանձնաժողովի ընդունված որոշումները կարող են բողոքարկվել ԵՊՀ ռեկտորին, «Լավագույն ուսանող» մրցանակաբաշխության արդյունքների հրապարակման օրվանից հետո՝ մեկօրյա ժամկետում: Հանձնաժողովի կողմից որոշումների ընդունման կամ «Լավագույն ուսանող» մրցանակաբաշխության կազմակերպման և անցկացման գործընթացում ՀՀ օրենսդրության կամ ԵՊՀ ներքին իրավական ակտերի, այդ թվում՝ սույն կանոնակարգի խախտումներ ի հայտ գալու դեպքում ԵՊՀ ռեկտորի պատճառաբանված որոշմամբ կատարվում է մրցանակաբաշխության արդյունքների վերանայում: